

Ponovljeni konkurs za eTwinning ambasadora u Bosni i Hercegovini

Obavještavamo Vas da Državna organizacija za podršku eTwinngu u BiH - Agencija za predškolsko, osnovno i srednje obrazovanje (DOP) raspisuje konkurs za eTwinning ambasadore koji su zaposleni u predškolskoj ustanovi i osnovnoj školi/razredna nastava, na teritoriji Bosne i Hercegovine.

DOP bira jednog ambasadora za nivo predškolskog odgoja i obrazovanja i jednog ambasadora razredne nastave za nivo osnovnog obrazovanja, na period od dvije godine, 2022- kraj 2023. godine.

eTwinning ambasador treba biti iskusni korisnik eTwinning portala, koji je zainteresovan da učestvuje u promociji eTwinning portala i eTwinning aktivnosti u području svoje ustanove i šire.

Zadaci eTwinning ambasadora su:

- pružanje pomoći DOP-u prilikom organizovanja događaja unutar BiH u vezi s promocijom eTwinning portala i pojašnjavanjem osnova ili detalja za rad portala
- organizovanje i samostalno provođenje promotivnih i edukativnih događaja i obuka u školama i predškolskim ustanovama u BiH u koordinaciji s DOP-om s ciljem povećanja broja registriranih eTwinnera, povećanja broja e-Twinning kvalitetnih projekata
- organizovanje onlajn obuka korištenjem IKT (informaciono-komunikacijskih tehnologija) alata. Softver za onlajn obuke osigurava DOP.
- doprinos u razmjeni primjera dobrih praksi s kolegama u BiH i u drugim zemljama učesnicama
- učešće na sastancima, konferencijama i seminarima samostalno ili u saradnji sa eTwinning ambasadorima u zemlji ili inostranstvu na koje ih uputi DOP ili dobije poziv organizatora događaja, a uz saglasnost DOP-a
- pružanje drugih informacija u vezi sa provođenjem eTwinning-a u BiH i druga vrsta pomoći DOP-u.

Tokom planiranja i provođenja navedenih aktivnosti neophodno je da ambasador kontinuirano sarađuje s DOP-om i od nje dobije saglasnost za svoje aktivnosti, posebno u slučajevima kada one podrazumijevaju i potrebu za finansijskom podrškom. DOP će snositi putne troškove za sve događaje za koje ambasador bude angažovan.

Uslovi za prijavu

Zainteresovani kandidati trebaju ispunjavati sljedeće uslove:

- da su zaposleni u odgojno-obrazovnoj ustanovi u BiH
- da su registrovani na eTwinning portalu
- da su osnivači najmanje jednog evropskog eTwinning projekta i da su partneri u najmanje jednom eTwinning projektu, kao i da značajno doprinose ovim projektima (rezultati moraju biti vidljivi kroz aktivnosti u Twinspace dijelu projekta)
- da dobro govore engleski jezik (međunarodni događaji namijenjeni eTwinning ambasadorima održavaju se najčešće na engleskom jeziku, razmjena primjera dobre prakse s drugim zemljama učesnicama eTwinninga se, također, odvija na engleskom jeziku)

- da koriste IKT alate neophodne za rad na eTwinning portalu (alati za komunikaciju, pretraživanje, razmjenu materijala i oglašavanje)
- da imaju razvijene organizacijske, komunikacijske i prezentacijske vještine.

Odabir kandidata

Kandidati koji su ušli u uži izbor bit će obaviješteni putem imejla.

Konačna odluka o odabiru eTwinning ambasadora iz BiH bit će donesena krajem januara 2022. godine. godine i to na osnovu cjelokupne prijave kandidata. Sa odabranim kandidatima će biti zaključen poseban ugovor. Prilikom odabira eTwinning ambasadora vodit će se računa o geografskoj zastupljenosti predstavnika odgojno-obrazovnih ustanova iz različitih dijelova BiH, o uzrastu djece s kojom rade i uspješnosti na eTwinning portalu. eTwinning ambasadori obavezni su da tokom obavljanja dužnosti ambasadora budu aktivni i da o svojim aktivnostima obavještavaju DOP. Ukoliko ambasador tokom dvogodišnjeg perioda djelovanja u toj ulozi nije aktivan u periodu dužem od dva mjeseca, izuzev perioda juli - august i decembar - januar, DOP zadržava pravo da ambasadora razriješi dužnosti.

Napomena: Naglašavamo da se aktivnosti eTwinning ambasadora često preklapaju s radnim vremenom zaposlenih odgojno-obrazovnoj ustanovi.

Kako se prijaviti?

Poziv za konkurs za eTwinning ambasadora bit će otvoren od 13. do 27. januara 2022. godine i objavljen na www.aposo.gov.ba i na eTwinning BiH FB stranici.

Onlajn prijavni obrazac možete popuniti klikom na link: <https://forms.gle/KcJ44Kn5Z8bo97A8>

Uz obrazac je potrebno da na e-mail adresu etwinningbih@aposo.gov.ba pošaljete:

- motivaciono pismo
- biografiju osobe u Europass formatu.

Konkurs ostaje otvoren do 27. januara 2022. godine, a sve dodatne informacije možete dobiti na broj telefona 033/942-852/855 ili putem imejla etwinningbih@aposo.gov.ba